

# Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2013-yil 27-mart, chorshanba № 23 (15661)

## Хуқуқий билим — тараққиётнинг муҳим омили

Тошкент ахборот технологиялари университетида «Ёшлар ва ҳуқуқий тарбия масалалари» мавзусида илмий-амалий анжуман бўлиб ўтди.

Адлия вазирлиги ҳамда Тошкент шаҳар адлия бошқармаси томонидан Олий Мажлис Қонунчилик палатаси, Республика Маънавият тарғибот маркази ва ҳуқуқни муҳофаза қилувчи органлар ҳамкорлигида ташкил этилган тадбир «Обод турмуш йили» Давлат дастурида белгиланган вазифалар ижросига бағишланди. Унда ёшлар ва ҳуқуқий маданият, маънавий ва ахлоқий тарбия, ёшлар ўртасида ҳуқуқбузарликларнинг олдини олиш каби масалалар атрофича муҳокама қилинди.

Тадбирда таъкидланганидек, мамлакатимизда интеллектуал салоҳиятли, маънавий баркамол, жисмонан соғлом авлодни тарбиялаш масаласига долзарб вазифалардан бири сифатида қаралмоқда. Мустақилликнинг илк йиллариданоқ ёшлар ҳуқуқларини ҳимоя қилиш борасида бир қатор қонунлар, норматив-ҳуқуқий ҳужжатлар қабул қилинди. Ўзбекистон Республикаси Конституцияси вояга етмаганлар ва ёшлар ҳуқуқларини ҳимоя қилишда олий юридик кучга эга бўлган ҳужжат бўлиб, унга асосан, давлат фуқароларнинг Конституция ва қонунларда мустақамланган ҳуқуқлари ва эркинликларини таъминлайди.

Тадбирда мустақилликнинг илк кунлариданоқ давлатимиз раҳбарининг ташаббуси ва бевосита раҳнамолигида вояга етмаганлар ва ёшлар тарбияси, уларнинг маънавиятини юксалтириш соҳасидаги ислохотларни ҳаётимизнинг бошқа соҳалари билан ўзаро чамбарчас боғланган, тизимли, босқичма-босқич амалга ошириладиган стратегияси белгилаб олинганлигини аниқ мисоллар орқали эътироф этилди. Мазкур ислохотларнинг асосий мақсади ёшлар иқтидорини жамият манфаатлари йўлида тўла рўёбга чиқиши учун ижтимоий, иқтисодий, ҳуқуқий, ташкилий жиҳатдан шарт-шароит яратиш ҳамда кафолатлашга қаратилди.

Бугунги кунда ривожланган ҳуқуқий демократик давлат, фуқаролик жамияти барпо этишда ёшларнинг билими, дунёқараши кенг бўлиши муҳимдир. Тадбирда адлия органлари томонидан манфаатдор идоралар билан ҳамкорликда ёшларнинг ҳуқуқий фаоллигини юксалтиришда дунёдаги ижтимоий-сиёсий жараёнлар, муаммо ва таҳдидларга бағишланган турли мавзуларда семинарлар, давра суҳбатлари ва бошқа сиёсий ҳуқуқий, маданий-маърифий тадбирлар ўтказишга алоҳида эътибор қаратилаётганлиги таъкидланди.

Анжуманда қонун ҳужжатларида вояга етмаганлар ва ёшлар ҳуқуқларини ҳимоя қилиш бўйича тадбирлар белгиланган нормалар ижросини мониторинг қилиш ва баҳолаш механизмларини янада такомиллаштириш, вояга етмаганлар ва ёшлар ҳуқуқларини ҳимоя қилиш бўйича доимий равишда жамоатчилик фикрини ўрганишни кенгайтириш масалалари ҳамда бу йўналишда ёшларнинг фаоллигини оширишга қаратилган тегишли таклифлар билдирилди.

**Фармон МАТНАЗАРОВ,**  
«Туркистон-пресс»



Сардор Муллажонов фотокolleжи

## Ўзбекистон — Ливан: 1-0

Futbol

Футбол бўйича Ўзбекистон миллий терма жамоаси 2014 йили Бразилияда бўладиган жаҳон чемпионати саралаш мусобақасининг тўртинчи босқич олтинчи тур учрашувида Ливан футболчиларини 1:0 ҳисобида мағлубиятга учратди.

Президентимиз Ислам Каримов раҳнамолигида футболни ривожлантиришга қаратилган алоҳида эътибор самарасида мамлакатимиз чарм тўп усталари халқаро майдонларда улкан муваффақиятларга эришмоқда.

Ўзбекистон миллий терма жамоаси ўз тарихида илк маротаба футбол оламининг энг нуфузли мусобақаси — жаҳон чемпионати йўлланмасини қўлга киритишга жуда яқин турибди. Халқимизнинг юксак

салоҳиятини, кучли характер ва ватанпарварлик намуналарини намояндаларига футболчиларимиз Осиё саралаш мусобақасининг якуний босқичида пешқадамлик қилмоқда.

Ўзбекистон ва Ливан миллий терма жамоалари ўртасидаги учрашув мустақиллигимизнинг 21 йиллиги арафасида янги қуриб битказилган мухташам «Бунёдкор» стадионида бўлиб ўтди.

«А» гуруҳида охириги ўринни эгаллаб турган Ливан учун Тошкентдаги

ўйин хал қилувчи аҳамият касб этарди. Ўзбекистон миллий терма жамоасидан енгилса, жаҳон чемпионатига бора олмаслигини яши билган ливанлик футболчилар муҳим учрашувда ҳамюртларимизга қаттиқ қаршилиқ кўрсатди.

Янги стадионга келган минглаб мухлисларнинг астойдил қўллаб-қувватлаши остида ҳужумкор ўйин намойиш этган футболчиларимиз муҳим ғалабага эришди. Учрашувдаги ягона голни терма жамоамиз сардори Сервер Жепаров киритди.

Ушбу ғалабадан сўнг Ўзбекистон миллий терма жамоаси 11 очко жамғариб, пешқадамлик мавқеини мустақамлади.

Гуруҳдаги иккинчи учрашувда Жанубий Корея футболчилари ўз майдонида сўнгги дақиқаларда урган голи эвазига Қатар миллий терма жамоасини 2:1 ҳисобида мағлубиятга учратиш, ўн очко билан иккинчи ўринга кўтарилди. Мағлубиятга учраганига қарамай, қатарликлар ва бу турда дам олган Эрон миллий терма жамоаси ҳам ҳисобларидаги етти очко билан мундиал йўлланмаси учун курашнинг давом эттирмоқда.

Ўзбекистон миллий терма жамоаси саралаш босқичининг навбатдаги учрашувини 11 июнь куни сафарда Жанубий Корея футболчиларига қарши ўтказди.

**Зоҳир ТОШХҲАЕВ,**  
ЎЗА мухбири



«Kamolot» xabarlari

Футбол бўйича олий таълим муассасалари талабалари ўртасида ўтказилаётган «Камолот» кубоги турнири қизгин паллага кирди. Айни кунда турнирнинг минтақавий босқичлари давом этмоқда.

## Финалга йўлланма

Улардан бири Қарши шаҳридаги «Насаф» футбол клубининг сунъий қопламали майдонида бўлиб ўтди. Унда Бухоро, Сурхондарё, Навоий ва Қашқадарё вилояти босқичи ғолиблари майдонга тушди. Дастлаб Термиз давлат университети билан Қарши давлат университети жамоалари баҳс олиб боришди. Ушбу ўйинда қаршиликлар 5:1 ҳисобида ғалаба қозонди. Иккинчи ўйинда Бухоро давлат тиббиёт институти жамоаси Навоий давлат педагогика институти жамоасини 2:1 ҳисобида мағлубиятга учратди.

Учинчи ўрин учун кечган баҳсда навоийлик ҳаваскор футболчилар сурхондарёлик тенгдошларини 2:1 ҳисобида ортда қолдирди. Шундан сўнг ҳаяжонли дақиқалар бошланди. Финалда Қарши давлат университети ва Бухоро давлат тиббиёт институти жамоалари. Мухлислар олқиши остида ўтган ушбу баҳс ҳужумларга бой бўлди. Ҳакамлар ҳайъатининг якуний ҳулосасига кўра, 0:3 ҳисоби билан техник ғалаба бухороликлар фойдасига ҳал бўлди.

Турнирнинг яна бир минтақавий босқичи Нукус ва Урганч шаҳарларида бўлиб ўтди. Нукус шаҳридаги «Турон» спорт мажмуасида бўлиб ўтган биринчи босқичда Қорақалпоқ давлат университети ва Урганч давлат университетининг ҳаваскор футбол жамоалари баҳс олиб боришди. Ўйин 1:0 натижаси билан қорақалпоғистонлик ёшлар фойдасига ҳал бўлди. Урганч олимпия захиралари коллежида ўтказилган жавоб ўйини эса, хоразмлик Жасур Салоевнинг пенальтидан киритган ягона голи билан якунланди. Турнирнинг республика финал йўлланмаси пенальтилар сериясида аниқланди. Унда 3:2 ҳисобида Урганч давлат университети жамоаси ғалаба қозонди.

— Ушбу турнир ёшлар орасида катта қизиқиш уйғотяпти, — дейди «Камолот» ЁИХ Марказий Кенгаши бўлим мудири Умид Ражабов. — Масалан, ўтган йилги минтақавий босқичларни 50-100 нафар томошабин кузатган бўлса, бу йил томошабинлар сони 250-300 нафарга етмоқда. Бу ҳам ёшларнинг футболга бўлган қизиқишини оширмоқда. Жамоаларда ҳам ўсиш бор. Ўтган йили Бухоро вилояти жамоаси минтақавий босқичга чиқолмаган бўлса, эндиликда финалга йўлланма олди.

Қизгин ва мурасасиз курашларга бой бўлаётган мусобақада ғолиб ва фаол иштирокчилар «Камолот» кубоги, ғолиблик дипломи ҳамда ҳамкор ташкилотларнинг эсдалик совғалари билан тақдирланмоқда.

Рустам КҮЧҚОРОВ

# ҚАДРИЯТ, УРФ-ОДАТ, АНЪАНА:

Бугун ахборот технологиялари орқали кириб келаётган бегона одатлар ёшлар онгида «оммавий маданият»нинг турли кўринишларига қарши кураша оладиган иммунитетни шакллантиришни талаб этмоқда. Бунда турли тарғибот тадбирлари билан биргаликда миллий қадриятларимизни ҳам ёшлар орасида кенг тарғиб этиш зарур. Бу борада «Камолот» ёшлар ижтимоий ҳаракатининг ранг-баранг тадбирларни ўз ичига олган «Қадрият, урф-одат, анъана ва ёшлар» лойиҳаси муҳим аҳамиятга эга. Бугун ушбу лойиҳа ёшларни миллий ва умуминсоний қадриятлар руҳида тарбиялаш, улар қалбида ватанпарварлик каби улғувор фазилатларни шакллантириш ҳамда халқимизни боқий қадриятлардан хабардор этишга хизмат қилмоқда. Қуйида ушбу лойиҳа доирасида юртимиз бўйлаб ўтказилаётган фестиваллар ҳақидаги лавҳалар билан танишасиз.

### БАРҲАЁТ ҚАДРИЯТЛАР

Миллий қадриятларимизни акс эттирган ушбу фестиваль Нуротанинг Қадоқ қишлоғи кенгликларида ҳам кўтаринкилик билан ўтказилди. Ушбу айёмга Навоий кон-металлургия комбинати, «Навоийазот» ОАЖ ўз ёрдамини қўшди.

Жамалаксоч, кашта либос кийган нуроталик қизларнинг бадиий чиқишлари билан бошланган байрам тадбири туманлардан ташриф буюрган Ҳаракатнинг бошланғич ташкилоти аъзолари ва маданият ходимларининг Наврўзи оламни мадҳ этувчи куй-қўшиқлари ила давом этди. Нуротанинг «Нуржаҳон», Хатирчининг «Ёр-ёр» фольклор жамоаларининг халқ қўшиқлари фестивал иштирокчиларини рақсга ундади. Хироми сочларидаги жамалак кўнғироқлари оҳанги билан уйғунлашган «Ширин» маданият саройининг рақоса қизлари «Тановар» куйини ўз ҳаракатларида жонлантиришди.

Қадоқ қишлоғининг тоғ ва адирларга туташган сарҳадлари халқ миллий ўйинлари намойиши билан янада файзга тўлди. Кўчқор уриштириш, арқон тортиш, кураш ўйинларида нуроталик йигитлар «кураги ер ўпмаган Алпомиш»дек ўзларини мардона тутдилар.

Варрақлар сайли, асосан, болакайлар учун завқли майдонга айланди. Юздан ортиқ варрак самода оқ кабутардек парвоз этдики, бу манзара ҳар кўнгила ҳайрат солди, десак, янглишмаймиз.

Нуротада қизи бор уйда кашта тикилиши азалий одатдир. Бу анъана ҳозир

ҳам давом этади. Фестиваль мобайнида ташкил этилган миллий либослар, каштачилик буюмлари кўргазмасида ҳам ана шу одат яққол намоян бўлди. Шунингдек, тадбир давомида Қадоқ қишлоғидаги 15-мактабда «Камолот» боғи бунёд этилди.

— Ёшларни ёт гоёлардан асрашнинг энг самарали йўллари билан бири уларни эзгу амалларга ўргатиш, қадрият ва анъаналаримиз моҳиятини тушунтиришдир. Фестивални ташкил этишдан мақсад ҳам айнан шу. Тадбиримизда беш мингдан ортиқ ёшлар иштирок этаяпти. Уларнинг ҳар бири бу ерга келолмаган тенгдошларига тушунганларининг мазмунини етказса ҳам, камидан ўн мингдан зиёд ёшлар қалбида қадриятларимизга ҳурмат ҳиссини уйғотган бўламиз, — дейди «Камолот» ЁИХ Навоий вилояти кенгаши раиси Нурбек Улуғбердиев.

«Камолот» боғига таълим муассасалари ўқувчилари юздан ортиқ мевали ва манзарали дарахт кўчатларини экишди.

Фестиваль майдонидаги тадбирлардан сўнг ёшлар иштирокида «Оқтепа» қабристонидан ободонлаштириш ишлари олиб борилди.

Тадбир якунида «Камолот» ЁИХ Навоий вилояти кенгаши томонидан фаол ёшларга эсдалик совғалар топширилди.

Гулжаҳон СУВОНОВА

### ҚАДРИЯТЛАРНИ ҚАДРЛАЙМИЗ

Ушбу лойиҳа Тошкент вилоятида ҳам кўтаринки руҳ-



да ўтказилди. Зангиота тиббиёт коллежида ташкил этилган фестивалда вилоятдаги ҳар бир туман ва шаҳардан келган ёшлар ўз ҳудудидаги миллий қадрият, урф-одат ва анъаналарни кўрсатиб беришди.

— Вилоятимизда 130 дан ортиқ турли миллат ва элатлар истиқомат қилади, — дейди «Камолот» ЁИХ Тошкент вилояти кенгаши раиси Азамат Камолов. — Ўз ўзидан кўриниб турибдики, ушбу миллат ва элатларнинг урф-одатларига ҳурмат билан қараш, диний бағрикенгликни асраш каби туйғуларни ёшлар онгига сингдириш зарур. Миллий қадриятларимизни асраб-авайлаш, уларни ёшлар орасида кенг тарғиб этиш мақсадида ўтказилаётган ушбу тадбирлар вилоятнинг барча туман ва шаҳарларида кўтаринки руҳда ташкил этилмоқда.

«Қадрият, урф-одат, анъана ва ёшлар» фестивали давомида «Варрақлар сайли», «Миллий ўйинлар», «Сумалак сайли» каби лойиҳалар ҳам бўлиб ўтди. Фестивалда вилоятнинг барча туман ва шаҳар жамоалари ўзларига бириктирилган миллатларнинг урф-одатлари ва таомларини ҳакамлар ҳайъати аъзоларига тақдим этишди. Бундан ташқари жамоалар турли қардош мамлакатларнинг урф-одатлари акс этган театрлаштирилган сахна кўринишларини ҳам намойиш этишди. Тадбир меҳмонларига эса, Ҳаракатнинг вилоят кенгаши томонидан тайёрланган сумалак тарқатилди.

Фестиваль давомида «Ошиқ ўйини», «Подачи»,

«От ўйини», «Кувноқ чавандозлар», «Хўрозлар жанги», «Ҳаққалаган қушлар», «Тортишмачоқ» каби миллий спорт ўйинлари ҳам бўлиб ўтди.

Варрақлар сайлининг куйи босқичида ғолиб бўлган болалар ўз варрақлари билан иштирок этишди. Зангиота туманидаги 1-мактаб ўқувчиси Қахрамон Исмоилов «Энг ёш варрақчи» номинацияси, Янгийўл туманидаги 5-мактаб ўқувчиси Рамазон Тўйчибоев «Энг чиройли варрақ» номинацияси, Байтқўрғон хизмат кўрсатиш касб-хунард коллежи ўқувчиси Сардор Фикриев «Энг баланд учган варрақ» номинацияси ғолиби бўлди.

Фестиваль доирасида ўтказилган тадбирларни Республика Маънавият тарғибот маркази, Тошкент вилояти ўрта махсус, касб-хунард таълими бошқармаси, «Камолот» ёшлар ижтимоий ҳаракати Тошкент вилояти кенгаши вакиллари баҳолаб боришди.

### НАВРЎЗ САЙЛИ

Пойтахтимизда қирқ минг нафардан ортиқ ёшларни бирлаштирган «Ёшлик» талабалар шаҳарчасида ҳар йили Наврўз — умумхалқ байрами катта тантаналар билан нишонланади. Миллий урф-одат ва қадриятларимизни акс эттирган Наврўз тадбирлари шаҳарчадаги барча таълим муассасаларида бўлиб ўтмоқда.

«Ёшлик» талабалар шаҳарчаси ҳокимлиги, «Камолот» ЁИХ талабалар шаҳарчаси етакчилар кенгаши ҳамда Олмазор тиббиёт

# ТЕНГДОШЛАРИМИЗ ТАЛҚИНИДА



коллежи ҳамкорлигида Наврӯз сайли тантаналари ташкил этилди. Унда баҳорий миллий таомлар, энг гўзал гулчамбар, «Бегойим қиз» миллий соч турмаклари, миллий фольклор намуналари, баҳорий деворий газета, қўли гул дурдоналар, миллий либослар кўргазмалари, варраклар сайли, арқон тортиш ва кураш мусобақалари ташкил этилди.

— «Қадрият, урф-одат, анъана ва ёшлар» шиори остида ўтказилаётган Наврӯз сайли талаба-ёшларда миллий урф-одатларимизга ҳурмат ва ифтихор туйғусини кучайтириш, уларнинг ижтимоий фаоллигини оширишга қаратилган, — дейди «Камолот» ЁИХ «Ёшлик» талабалар шахарчаси етакчилар кенгаши раиси Шухрат Бойкулов. — Тадбир сўнгида ҳар бир шарт бўйича ғолиб бўлган ёшлар диплом ва эсдалик совғалар билан тақдирланади.

Шу куни «Ёшлик» талабалар шахарчасининг қай бир ҳудудида бўлмайдик, байрамона безатилган давралар ҳамда ёшларнинг ўйин-кулгисига гувоҳ бўлдик. Шаҳарчадаги «Камолот»чиларнинг режасига асосан, ҳар куни ҳудудда жойлашган талабалар тураржойларида сумалак сайиллари ўтказилди. Қадимий урф-одатларимиз, миллий ўйинларимизни, қўшиқ ва лапарларимизни ўзида мужассам этган сумалак сайилларида барча тадбирларнинг ташкилотчилари талаба ёшлардир.

Сумалак сайиллари кеч тушгач, талабалар тураржойларида маънавият кечалари сифатида давом этди. Унда тарихчи-этнограф

олимлар талаба-ёшларга Наврӯз байрамининг келиб чиқиш тарихи, мамлакатимизда бу кўхна байрам тарихнинг аччиқ саҳифаларида неча бор тазйиқларга учраганлиги, шунингдек, сумалак ва бошқа миллий таомлар ҳақида маълумот беришди.

**Рустам ЮСУПОВ,**  
**«Turkiston» мухбири**

## ГЎЗАЛ АНЪАНАЛАР ТАНТАНАСИ

Карнай-сурнай наволарининг жаранги обод гўша Маданият ва истироҳат боғини жонлантириб юборди. Турли тадбирлар ўтказиш учун ўзига хос кўргазмалар билан безатилган истироҳат боғи йўлаклари қувноқ болажонлар билан тўлиб, қизгин кўрик-танловлар билан бошланиб кетди.

Барча туманлардан ташриф буюрган ёшлар ўзларининг кўргазмалари чиқишлари, томошалари, ижодий ишлари ва ўйинлари билан «Қадрият, урф-одат, анъана ва ёшлар» фестивалининг тантанали ўтишини таъминладилар. Турли кўринишдаги ўйинларда дўстона кайфият устун турган бўлса-да, беллашувлар шиддатли курашлар остида кечди. Иқтидорли, билимли ва зукко ўғил-қизлар бор маҳоратларини намойиш этди.

«Ҳар бир ёшга бир ниҳол», «Варраклар сайли», «Қарияларни қадрлайлик!», «Наврӯз — менинг нигоҳимда», «Наврӯз дастурхони», ёш хунармандлар ва тадбиркорларнинг миллий кўргазмаси, қўғирчоқсозлар, миллий таомлару сумалак сайиллари

каби йигирмага яқин лойиҳаларни ўз ичига қамраб олган «Қадрият, урф-одат, анъана ва ёшлар» фестивали барчага чинакам байрам кайфиятини улашди.

«Варраклар сайли» лойиҳаси доирасида ўтказилган беллашувда «Хуш келибсан, Наврӯз!», «Баҳорим — беғуборим» ёзувлари туширилган варракларнинг кўкка парвози болажонларнинг шодон қийқириғига сабаб бўлди. Абдувоҳид Акрамов, Жавлон Аслонов, Ақобир Сатторов, Элёр Ражабов ҳамда Шохбоз Вафоевларнинг варраклари булутли осмон тоқига етди, гўё.

Ёш хунармандлар ва тадбиркорларнинг миллий кўргазмасида Бухоро иқтисодиёт ва банк коллежи ўқувчиси, моҳир тўқувчи Шаҳноза Каримова, декоратив ва қўл меҳнати устаси Гулноза Каримова, «Ўзбекистон маданияти ва санъати форуми» жамғармаси томонидан ўтказилган «Bazar-Art» XI кўргазма-ярмаркада каштачилик ва патдўзлик йўналишида муваффақиятли иштирок этган Бухоро педагогика коллежи ўқувчиси Сурайё Халилова, ёш заргар Қурбонбек Қодировнинг ижодий ишлари кўпчилик эътиборини жалб қилди.

Миллий либослар кўргазмаси ҳам ўзига хос тарзда ташкил этилди. Зарина Тошева, Ситора Хайриева, Мамлакат Шарипова, Гулбахор Сатторова ҳамда Нафиса Аҳмедованинг ишлари ҳакамлар томонидан муносиб баҳоланди.

Энг кўп ёшларни қамраб олган «Миллий спорт ўйинлари» лойиҳаси ёши кексаларни-да ўзига жалб этди.

— Шундай тадбирни ташкил этганларга минг раҳмат. Қаранг, қақажон болажонларнинг унутилиб бораётган қадимий ўйинларни мармига етказиб намойиш этишлари болалигимга қайтарди, — дейди Муҳтарома ая Қурбонова. — Болаликда кўпроқ чамбилу тош чертар ўйинларини ўйнар эдик.

Болалар фестивал давомида кўплаб миллий ўйинларнинг тарихидан хабардор бўлишди. Шунингдек, болажонларга завқ-шавқ бағишловчи унутилиб кетган яна бир неча миллий ўйинлар борки, улар «Бир қўл, бир оёқ», «Хумданақ», «Гувала узатиш», «Сополак» деб аталади. Ҳар бир миллий ўйин ўзига хослиги билан бир қаторда болаларнинг жисмонан соғлом ва маънан баркамол бўлиб ўсишида муҳим аҳамият касб этади. Бухорода ўтган «Қадрият, урф-одат, анъана ва ёшлар» лойиҳаси давомида мана шу миллий спорт ўйинлари қайта дунё юзини кўрди, десак, адашмаймиз.

«Наврӯз — менинг нигоҳимда» дея номланган расмлар танловида 46 нафар ёш қатнашди. Ким сумалак сайли, ким Наврӯз ва навбахор муҳаббатини бўёқли оҳангларда тараннум эта олган, ким баҳорга зеб берган, хуллас, ҳар бир чизги ўзига хос мафтункорликда жилланди.

Миллий таомлар танлови ҳам қизиқарли кечди. Ўн бешта ўчоққа қозон осган ўн беш нафар ёш ошпазнинг чаққон хатти-ҳаракатлари байрам қувончларига янада кўтаринкилик бағишлади. Ромитанлик Шаҳзод Мардонов, Бухоро шаҳридан Бахтиёр Шаропов, қоровулборзорлик Малик Аҳмедов каби ошпазлар, олотлик Дилноза Раззоқова, Вобкентдан келган Камола Саъдуллаева каби сумалакпазлар шитобида ўланлару лапарлар янгради...

Фестиваль иштирокчиларини тақдирлаш маросимида ўқиб эшиттирилган пешкулик кекса отахон Василбек Изомовдан келган бир энлиқкина мактуб кўнгилашга илиқлик бағишлади. Мактубда: «Раҳмат, сизга, болаларим! Сизларнинг меҳнатингиз ҳамда илиқ меҳрингиз нафақат хонадонимга, балки қалбимга ҳам чароғонлик олиб кирди. Кам бўлманлар, топганларинг тўйга буюрсин!» деб ёзилганди.

Бир сўз билан айтганда, «Қадрият, урф-одат, анъана ва ёшлар» нафақат ёшларнинг, балки турли ёшдаги ҳамюртларимизнинг энг гўзал ва энг қувончли тантанасига айланди.

**Лайло ХАЙИТОВА,**  
**«Turkiston» мухбири**

2013-yil — Obod turmush yili

Атрофимизни ўраб турган наботот оламининг инсон ҳаёти учун аҳамиятини ҳар қанча таърифласак оз. У ўзининг гўзаллиги билан бизга нафақат маънавий озуқа беради, балки ҳавони инсон учун зарур бўлган кислород билан тўлдиради, табиатни зарарли газлардан тозалайди. Ёзнинг жазирама ҳароратини табиий салқинлатиб, микроклим яратади. Шу боис ҳар йили манзарали ва мевали дарахтларни экиш, гулларни кўпайтириш, мавжудларига шакл бериш, зарур бўлганда, янгилашга юртимизда алоҳида эътибор қаратилади.

## Кўклам — ёшлар шижоати билан кўркам

Диёримизда айна кўкаламзорлаштириш палласи қизгин давом этмоқда. Кўчалар четига, бино ва дўконлар олдида кўчатлар экиш, ҳар бир гузар ва бекат олдидаги кўчат ва гуллар манзарасининг ўзига хос, хилма-хиллигига аҳамият берилмоқда. Бугун юртимиз кўчаларидан ўтар эканман, бугунги олиб борилаётган ободончилик, бунёдкорлик ишларини кўриб ифтихорга тўламан, жонажон Ватанимиз боғу-бўстон ва гулзорга айланаётганидан ғурурланаман.

Бу борада биз таҳсил олаётган Наманган муҳандислик-педагогика институтида ҳам ибратли ишлар амалга оширилмоқда. Шу кунларда институт раҳбарияти белгиланган тадбир асосида олий таълим муассасамиз ҳудудида манзарали дарахт ва турли-туман гул кўчатларини экиш, майдончаларни ўғит билан озиклантириш каби баҳорги юмушлар давом этмоқда. Устозларимиз, фаол «Камолот»чилар етакчилигида биз, талабалар институтида ҳудудини гўзал масканга айлантиришга ҳаракат қилмоқдамиз.

Баҳорнинг дастлабки кунлариданоқ институтимиз тасарруфидаги майдонларга 6307 туп мевали, 113 туп манзарали дарахт кўчати ва 750 дона гул ниҳолини эдик. Энди уларнинг парваришини қатъий назорат остига оламиз.

Обод турмуш йилида кўча ва хиёбонларимиз, маҳалларимиз янада кўркам бўлоғи учун биз, ёшлар ободонлаштириш ишларига кўмаклашишни шарафли бурч деб билишимиз, бу ишга меҳр ва иштиёқ билан киришимиз, муносиб ҳиссасимизни қўшимиз лозим.

Инсон — табиатнинг бир бўлаги, биз уни қанча эъзозласак, у бизга шунчалик мурувват кўрсатади ва неъматларидан баҳраманд этади.

**Маҳмуджон МУҲИДДИНОВ,**  
**Наманган муҳандислик-педагогика институти талабаси, Беруний номидаги давлат стипендияси соҳиби**

# Санъат ғунчалари аниқланди

Пойтахтимизда «Санъат ғунчалари» республика ёш музикачилар кўрик-танловининг ғолиблари эълон қилинди. Мазкур танлов Халқ таълими вазирилик, Ўзбекистон бастакорлар уюшмаси ва «Соғлом авлод учун» халқаро хайрия жамғармаси ҳамкорлигида бу йил ўн олтинчи мартаба ўтказилди.

Финалда Қорақалпоғистон Республикаси, вилоятлар ва Ташкент шаҳридаги музика мактабларида таълим олаётган ҳамда танловнинг вилоят босқичларида ғолиб бўлган 150 нафарга яқин иқтидор эгалари ўз маҳоратларини намойиш этишди. Иштирокчилар кичик (9-13 ёш) ва катта (14-16 ёш) гуруҳларга бўлинган ҳолда жаҳон классик музикаси ҳамда миллий куйлардан намуналар ижро этишди. Уларнинг чиқишлари иккита: зарбли чолғулар ва дамли чолғу асбоблари йўналиши бўйича тажрибали ҳакамлар ҳайъати томонидан баҳоланди.

Натижаларга кўра, 67 нафар ёш иқтидор соҳиби «Санъат ғунчалари» республика кўрик-танловининг ғолиби деб топилди. Шулардан уч нафари

Гран-при мукофотига сазовор бўлди.

Танловнинг тақдирлаш маросимида сўзга чиққан «Соғлом авлод учун» халқаро хайрия жамғармаси бошқаруви раиси Светлана Иномова ва Халқ таълими вазириликнинг биринчи ўринбосари Бахтиёр Дониёров мамлакатимизда иқтидорли ёшларни қўллаб-қувватлаш давлат аҳамиятидаги масала эканини таъкидлади. Айниқса, музика санъати ва музика таълимини ривожлантиришга юқори эътибор қаратилмоқда. Ҳукуматимиз томонидан қабул қилинган махсус давлат дастурига мувофиқ, айна пайтда юртимизда замонавий болалар музика ва санъат мактаблари барпо этиляпти, уларнинг моддий-техник базаси мустаҳкамланяпти. Республикаимизда му-



зика таълимига ихтисослаштирилган мактаблар, академик лицей ва олий таълим муассасаси фаолият кўрсатмоқда. Ҳар йили Ўзбекистонлик ўқувчилар кўлаб республика ва халқаро танловлар, фестивалларнинг ғолиб ва совриндорларига айланишмоқда. Бундай иқтидор эгаларини кашф этишда «Санъат ғунчалари» республика ёш музикачилар кўрик-танловининг ўз ўрни бор.

— Бу йилги танловда

Гран-при мукофотига сазовор бўлдим, — дейди мамнуният билан Республика ихтисослаштирилган музика ва санъат академик лицейи ўқувчиси Бобур Исмоилов. — Очиғи, жуда ҳаяжондаман. Чунки финалда кучли рақиблар билан беллашишга тўғри келди. Уларнинг ижро маҳоратига тан берса, арзийди. Тўрт йилдан буён саксофон музика асбобини чаламан. Фортепьянони ҳам мукамал ўзлаштирганман. 5-синф-

да «Умид учқунлари» республика кўрик-танловида 3-ўринни қўлга киритдим. 7-синфда Санкт-Петербург шаҳрида анъанавий равишда ўтказилувчи «Окно в Европу» халқаро танловида ҳам совринли ўринни эгалладим. «Санъат ғунчалари»да жаҳон ва юртимиз композиторлари ижодига мансуб учта асарни ижро этдим. Барчаси ижро услуби жиҳатидан мураккаб асарлардир. Бугунги галаба мен учун қадрли. Чунки унинг асосида қанчалаб устозларим, қолаверса, ўзимнинг меҳнатим ётибди.

Танлов ғолиблари Ўзбекистон давлат консерваториясида тантанали равишда тақдирланди. Уларга ташкилотчилар томонидан диплом ва эсдалик совғалар топширилди. Сўнг меҳмонлар эътиборига болалар иштирокидаги концерт дастури ҳавола этилди.

**Наргиза УМАРОВА,**  
**«Turkiston» мухбири.**  
Сардор Муллажонов олган сурат

## Ta'lim taraqqiyoti

Юртимизда иқтидори ва қобилиятини намойиш этиб келаётган ёшлар орасида сирдарёлик ўқувчилар ўзига хос ўринга эга. Гулистон туманидаги 27-ихтисослаштирилган мактаб ана шундай салоҳиятли ўқувчиларни камолга етказётган таълим даргоҳларидандир.

## Устозлардан ўзган шогирдлар

Физика-математика ҳамда кимё-биология фанларини чуқурлаштирилган ҳолда ўқитишга мўлжалланган мазкур мактабда 277 нафар ўқувчига 26 нафар юқори малакали устоз сабоқ бераётир. Ушбу билим масканида ўз ишини мукамал биладиган, билимини, меҳрини болаларга бахшида этиб келаётган педагоглар кўпчиликини ташкил қилади. Жалол Султонов эса уларга бош-қош.

Мазкур ихтисослаштирилган мактабда ўз соҳасининг билимдони бўлган устозлар анчагина. Бугунги кунда кимё-биология ўқитувчиси Собира Бобоева, физика фани ўқитувчиси Шерали Сайдалиев сирдарёлик устозлар орасида пешқадамлардандир. Уларнинг иш тажрибаси ўқитувчилар ўртасида кенг оммалаштирилмоқда. Уларнинг фидокона меҳнати самараси ўлароқ, мактаб ўқувчилари туман ва вилоят миқёсидаги фан олимпиадаларида, билимлар беллашувида фаол иштирок этиб, юқори ўринларни эгаллаб келяпти.

Чунончи, мактаб ўқувчилари 13 та фан бўйича фан олимпиадаларининг туман босқичида муваффақиятли қатнашиб, улардан саккиз нафари вилоят босқичида қатнашиш ҳуқуқини қўлга киритди.

«Келажак овози» мега танловида мактаб ўқувчиси Акмал Хусанов муваффақиятли иштирок этган бўлса, «Ораста қизлар» кўрик-танловида 9-синф ўқувчиси Мафтуна Эшимовага омад кулиб боқди. Шунингдек, Сиддиқ Худойкулов расмлар кўрик-танловининг республика босқичида қатнашиш шарафига муяссар бўлди.

Булардан ташқари, мактабнинг 4-синф ўқувчиси Шаҳзод Жалоловнинг «Ўзбекистон — Ватаним маним!» кўрик-танловидаги фаоллиги, Мафтуна Эшимованинг «Конституция — бахтимиз пойдевори» иншолар танловидаги зукколиги, 6-синф ўқувчиси Мухлиса Шокиржонованинг рақс йўналиши бўйича «Янги авлод» болалар ижодиёти фестивалидаги жозибали иштироки кўпчиликни қувонтирди. «Баҳор маликалари — 2012» мусобақаларида энгил атлетика бўйича вилоят босқичида қатнашган 6-синф қизлари яхши натижани қўлга киритишди. Худди шунингдек, «Умид ниҳоллари» спорт мусобақасида ҳам мактаб ўқувчилари доимо пешқадам.

Иқтидорли болаларнинг камол топишида мактабда яратилган шарт-шароитларнинг ҳам аҳамияти катта. Ҳозирда 28 та фан ва 5 та спорт тўғрисида мунтазам ишлаб турибди. Фан ойликлари, маънавий ҳафталиклари доим ўтказиб борилади.

Албатта, бу борада Дилафрўз Усмонова, Муслима Аҳмедова, Мушарраф Раҳимова, Ҳанифа Ламинова, Шоира Аҳмедова, Раҳматулла Жўлиев сингари илғор ўқитувчиларнинг меҳнати, самарали саъй-ҳаракатлари муҳим аҳамият касб этмоқда. Ана шундай устозлар меҳнати эвазига мактаб ўқувчилари орасида истеъдодли ёшлар кўпаймоқда.

**Ашуралӣ БОЙМУРОД,**  
**«Turkiston» мухбири**

## «Kamolot» loyihalari

## Ижодий кўргазмалар, самарали учрашувлар

Самарқанд вилояти ҳокимлиги ҳамда «Камолот» ёшлар ижтимоий ҳаракати вилоят кенгаши мамлакатимиз мустақиллигининг 22 йиллиги муносабати билан вилоятнинг барча шаҳар ва туманларида «Аждодларга муносиб — Президент фарзандлари» номи остида ёшлар фестивалларини ўтказмоқда.

Фестивалларда таълим, соғлиқни сақлаш, қишлоқ хўжалиги, ишлаб чиқариш, хизмат кўрсатиш соҳалари, мудофаа, ички ишлар, ҳуқуқтартибот органлари ва жамоат ташкилотларида фаолият юритаётган ҳамда ўзининг юксак салоҳияти, самарали фаолияти ва ютуқлари билан жамоатчилик эътиборига тушган ёшлар, шунингдек, ички ишлар профиллактик ҳисобида турувчи ва барча тоифадаги ёшлар иштирок этмоқда.

— Шу кунга қадар ушбу фестиваллар Пастдарғом, Иштихон, Пайариқ, Қўшработ, Нарпай, Булунғур, Тойлоқ туманлари ва Самарқанд шаҳрида юқори кайфиятда бўлиб ўтди, — дейди «Камолот» ЁИХ Самарқанд вилояти кенгаши раиси Алишер Норбоев. — Фестивалнинг асосий мақсади ёшларни Ватанимиз раванги ва халқимиз фаровонлиги йўлида бирлаштириш, иқтидорли, фаол, ташаббускор ҳамда таълим ва меҳнат жараёнида юқори натижаларга эришаётган «Камолот» аъзоларини ра-



батлантиришдир. Фестивалларга ҳар бир шаҳар ва туманлардан беш юз нафарга яқин ёшлар жалб этилмоқда.

Фестиваль доирасида фаол ва иқтидорли ёшларнинг шаҳар ва туманлар ҳокимлари билан учрашуви, ижодий кўргазмалар, саноат ва ишлаб чиқариш корхоналари ҳамда фермер хўжаликларига саёҳат, шунингдек, байрамона концерт дастурлари ташкил этилмоқда.

**Гулноза Мамаюсупова,**  
**Пайариқ хизмат кўрсатиш касб-хунар коллежи ўқувчиси,**  
**фестиваль иштирокчиси:**

— Ушбу фестиваль бизнинг туманда ҳам катта қизиқиш билан кутиб олинди. Туман тиббиёт коллежида бўлиб ўтган кўргазмада ёш тадбиркор, фермер ва хунармандлар маҳсулотлари, ёш ижодкорларнинг ижод намуналари намойиш этилди. Челақ хизмат кўрсатиш касб-хунар коллежида фести-

валнинг концерт дастури бўлиб ўтди. Унда Ўзбекистон Ёзувчилар уюшмаси вилоят бўлими вакиллари, Зулфия номидаги Давлат мукофоти совриндорлари ҳамда спортчиларнинг иштироки бизга бир олам қувонч бағишлади.

**Лобар Гулмуродова,**  
**пастдарғомлик ёш хунарманд, фестиваль иштирокчиси:**

— Фестиваль иштирокчилари туманимиздаги «Ёшлар» боғи, 1-ФХДБ бўлими, маданият саройи ҳамда «Ёшлар» марказида бўлишди. Бу ерда тенгдошларимизга мустақиллик йилларида қўлга киритилган улкан ютуқлар ва муваффақиятлар тўғрисида маълумотлар берилди. «Ёшлар» марказида ташкил этилган ёш тадбиркорлар ва ижодкорларнинг кўргазмаси барчада қизиқиш уйғотди. Бу каби фестивалларнинг ўтказилиши иқтидорли тенгдошларимнинг сафини янада кенгайтиради.

**Жасур РАҲМОНОВ,**  
**«Turkiston» мухбири**







